

Jonko Sokome Irisayó Mu Nakayáñoní

Iñondutu Unipareko Ñuno Uró

Mande Kembé

Komo suki uni kato sokome ña **Grik** mandewore nakayáñaró, quko enejo owí kama nekaró. Itaka iño-iño uni qambu qundo ñande ye iñoyotengo, ko Sepeti koro nañuní ñu, **asáñowí uni** Jon, sokome ña nakayáñaró. Sokome kumi ñuya nakayáñaró, asa *1 Jon*, *3 Jon* ko Miti Mande sokome qu ka nakayáñaró. Sokome soso ñu, mande koro murí muko kanata na. Uni *2 Jon* nakayáñaró qundo owí kama nekaró, quko enejomboro ñande yaró, “huru-huru koro tapá uni,” yaró. (*2 Jon 1* weyo qembe.) Ñundiro nore ñande ye iñoyoteto, ko enendo **Anutu koro huru-huru** ñuno owé parámi raró.

Do naru horé nakayáñaró ñuya kama iñoyoteto. Itaka iño-iño uni kumimbo ñande yeyotengo, koretero sokome ña nakayáñaró, tukú *1 Jon* nakayáñaró. Dokoro sokome irisa-irisa quno ñuno uni kaná-kaná ñuro yaró. *2 Jon 7* ñuno uni kaná-kaná ñu Anutu koro uniparetoya watí kunditeyañgurí. Quko *1 Jon 2:19* ñuno uni kaná-kaná ñu toñemukañgurí.

Asa itaka iño-iño uni kumimbo ñande ye iñoyotengo, ko Jonko kumima naru 66AD ñuno sokome ña nakayáñaró, peka, quko qambu ñande yetengo, 85AD koya 100AD keweroko ñuno nakayáñaró, peka. (Asa “66AD” murí muko ñandiro, nimimbo Yesu pisiyaró, yate kumima naru 66 ñunde rotaró. Nore kumima naru 2,000 ñunde rotoro yate itaka yoteto.)

Komo suki **Anutu koro huru-huru** ñuro tapá unindo ñande yañgurí, ko Jonko sokome ña Efesus yendémo nakayáñaró. Nakayáñoní **huru-huru** enesó-enesó Esia mira parámimo ñuno yorañgurí quno uyareró. Uni kaná-kaná ñundo iño-iño ye enesó-enesó tero uyarero mande koroqe rondaqe yunoyañgurí. Asa ko Jonko **huru-huru** meyowo ñu kawaware tewero quro sokome ña nakayáñoro iño-iño meté mu rondaqe yunaró.

¹No huru-huru koro tapá uni ka, nondo sokome ña nakayáñoro rewe

ke pare parámimboya nambo-simóngepoya ηuno uyaró.^a Anutuko komo ye rokó yereró, ko no newonde hamó ye yunoyoteno. ηunde teteno, quko nondo nanje kini. Kini, unipare soso mande hamó injoyotengo ηuko soso newonde hamó yunoyotengo. ²Dokoro mande hamó noreηomo yote ηuko noreya suki-suki yoweya.

³Meté Anutu Awandoya, Awandoro Nanuní Yesu Kristo^b koya otete hamó mu tero newonde nunoro samaka-samaka tuwó^c te nunowari, ko sikínani te nunowari, ko newonde ime nunowari.

⁴Anutu Awando mande kondé ka nore nimiraró, ko simóngepo inoro mande hamó ηu howeyotengo. ηunde ηuroko no ninju-ninju parámi teyoteno. ⁵Quko ná, no mande kondé ka nakayáηoweka qeno. Mande kondé ηuko keta qu kini. Kini, nore komo suki ratowó. Mande ηuko ηandiro: nore soso newonde epe ino-ino tewato. ⁶Newonde yunowero murí ηuko ηandiro: nore Anutu koro mande kondé soso inoro mande ηu howeyoteto. Asa ye mande ηuko yendo howewero quro ye komo suki inangurí.

⁷Dokoro uni kaná-kaná qambu ηundo nore norotoro mirane-mirane uyarengurí. Uni ηundo ηande yeyotengo, Yesu Kristo ηuko uni hamó kini. Uni ηunde quko kaná-kaná uni ka, ko Kristo koro sanjiríηo. ⁸ηuro tero ye meté sopowanjo, ye o soso norendo koweyumu teyate rato tunoqaró ηu ri piyo teweya koro. Ye kondé kaneya kimo meté soso ηu rewango.

⁹Uni kato mande Kristoko rondaqe yunaró qu karóηoro mande meyowo howeyoweya quko, Anutuko enejo quroko kama yote. Uni kato mande Kristoko rondaqe yunaró ηu howeyote quko awandoya nanunímboya enejo quroko yotiri. ¹⁰Uni ka yeno mahero mande meyowo rondaqe yunoyote tiníqo, asa yendo eneya topo ma tewero, ηu rero yayemo ma owero. ¹¹Uni kato eneya nembe rero tiníqo, enejo khayó piyimi ηu samakanoyote.

¹²Nondo mande parámi yimirowero quro inoyoteno, quko sokome kanoko nakayáηowero ηuro piyimiηoteno. Nondo ηande inoteno, no uyare ye yiyowano, nore mande kopo tero ninju-ninju hamó tewato.

¹³Keηo kuwonjeporo simó, kuwonje ηuko Anutuko enejomboro rokóηaró, enendo yunguna keretengo.

^a 1 “pare parámimboya nambo-simóngepoya” ηuko pare hamó peka. Quko ino-ino uni qambu qundo ηande yeyotengo, ko pare ηuko *Anutu koro huru-huru* ka, enejo nambo-simó ηuko inodontu unipareto ηuno huruwoyangurí. Ko enejo kuwí ηuko *huru-huru* meyowo ka. ^b 3 “Yesu *Kristo*” - komo suki *ye-ye unindo* Anutuko uni ka rokóηoní mahero wiri yerete uni parámi horé tunoqeweya qu karo yangurí. Juda unipareto uni maheweya ηu, “Kristo,” ma, “*Mesaiya*,” ye nekanjurí. Asa Yesu mahini enejo unipareyó, “Kristo Yesu,” ma, “Yesu Kristo,” nanje ye nekanjurí. ^c 3 “*samaka-samaka tuwó*” ηuko Anutu enejombo nore samaka yereyote. Kimoyó moré kini.